

3 YOOHANEE

Yoohaneefa ínaaqianna ákara rúmannimaqóo úfafa.

¹Óo Kaiusafa aníndiri Yísuna ánoona ufa qímarianaki márunnara qínée faiqí firaasá aníara qímuqusimarifaqa maa-akarána aní ámaqaidaqa.

²Qiní qifaaqasáa qíqoondi. Aní maraquana ámiqiranaki dóo máridanoo, aní afaaqa faqa aurírana dinee sía márianifeera aneenná aiqáma ainaina faqa miná amana kái ámiqiranaki márianifeera Ánutunara innaaru qídaqa. ³Óo Kaiusafa aní ákaqaafasaa maí aniréeqa aníara Yísuna ánoona ufamau maqee maqee fímarianaqa qímaqímiafaqa miná iriséeqa asasídaqa. Kúqaa ánoona máree maríannanara aní óosana koorooifaqa qínée qáfeeqa. ⁴Qiní faiqi námukámmafi máriasa kúqaa ánoona aatata fímarianara minára kai irisée firaasasirana qímidaqa. Sía moo áinaina mi-asasírana amana kái máridanoo.

Yoohaneefa Káiusana óosanara amooqu úfafa.

⁵Óo Kaiusafa qiní qíqoondi, Yísuna ufa maqúsa maqusa qímannimiqanuasa aní maqúsai óonuraafana óosana óosana dadaaqírana ámiqimasaida nímimariananoo. Anée sía moó máqanna fee qímasee minnísaanafa máriananoo. ⁶Anée dadaaqímarianausa misá aní aufakiana qímaqímiafaqa írídaqa. Misá aníara maasá maaqóoqaraasa amaana máaqaki kéeqee máriasa nífusaa anée misára ámuqusi maríannanara kooroo ída qiafaqa írídaqa. Ánutufa áfaarimarifa máridanoo anée faqa miná aanna réenana mi-fasiqáusa dadaaqínana anée Ánutuna aináinira faiqi amana kái mária. ⁷Yísuna ufa qímannimiqanuasa ínnee sía misá níqafuosa moo máqannaasa máriafanoo sía aamína máqanna maqúsa maqusa fidaqa misá munnimaina marasáida naqá fímariaqu. Yísuna áuqusaa miná ufa kai máree fímariaqu, misá maasá Yísuna ufa írimariafa faiqára máaqaina kai maraséeqa Ánutuna aináinirausaikamambiqá

nídaqa misaikána máraidaqa. ⁸Maasá Yísuna ufa írimarunausa misá kadáapiriranara iriséeqa misá miqímasee ánoona ufa saikímariasa moodáanaki dadaaqíqa maasá saiká faqee qímasee máraaqeera aní qímamidaqa.

Yoohaneefa Dootareefeesana mandóosanara qímaqoo úfafa.

⁹⁻¹⁰Qinée qúsa ákara ríqa ínni miqóoqaraasa amaana máqaki kéeqee máriasa nímiaqeera. Nímaqauanoo Dootareefeesafa narí kai naríaraa úriqararausee qímarifa qíní ákarakinaa ufa sía írimarifa, kásooqaqee ínniki qinée óonureeqa miná óosana ínniki márina únna ufa mandúfa maasára qímarina únna ufa óosana óosana qímarina kooroo íanáura. Mifá sía minára kai ídanoo Yísuna ufa qímannimiqaanusa miqóo óonuraafanoo sía misá dadaaqídanoo misá ititánnimaqaidanoo. Miqóoqaraasa amaana máqaki kéeqee maríasa quándaki misá dadaqíraree qíafanoo misára faqa quqásee dóo fuaqée qídanoo.

¹¹Óo Kaiusa qíní qífaaqasáa qíqoondi, anée mandá ainaina qáfamasee sía miná ámmeemmeerina ámiqira óosana qáfamaseenana miná ámmeemmeerina miná aanna ráinanoo amaná máriannoo. Andeeqára óosana máree maríasa misá Ánutunaindi márídaqa. Mandáinaina máree maríasa misá sía Ánutunara írimariasa márídaqa.

¹²Ínniki faiqí moo márifa miná áuqu Deemeetariusafa minára aiqámausa kúqaa andeeqára fasiqa fee qídaqaa. Ánoona ufa faqa mi-fasiqánara andeeqára fasiqa fee qídanoo. Maasá kúqaa ánoona ufa kai qímaruna ínnee írimariasa máriafanoo sía mi-fasiqánara únna qídaqaa. Maasá minára ámiqira fasiqa fee qídaqaa.

Ákara átinni máfi taikárufa.

¹³Qinée moómoo ufa aní qímamiani qímaseeqa sía amana papiqasáa ákara ríqa. ¹⁴Káqikaaqoo anée íanánai qinée fírraree qídaqaa. Óonureeqa ámiqimmandee narí qímami narí qímami qianáuranoo.

¹⁵Yísuna asooárafa anífaqa máriani. Aní áqoondiqa maaqóo qáraasa aiqámausa aní ámandaidaqa. Maasá qíqoondiqa miqóo máriasa núqu rámassee qímannimia. Maasá misá nímandaidaqa.